

NytaairstaleUkiortaami oqalugiaat 2022

*Naalakkersuisut siulittaasuat*

*Múte Bourup Egede*

-0-

Asasakka ataqqinartut nunaqqatit. Ukiortaami uummammit pisumik pilluaritsi.

Ukiup taarnerpaaffia qaangiukkaluttuarpoq. Ullukinnerup juullillu ulluisa nalliusineratigut ilaqtariittut inuiattullu asanninnermik ataasimoornermillu qanortoq misigisaqarsimagisa.

Ullunut aggersunut - Siunissamut - Nukissanik tunngaviliiffiusumik.

Ukioq 2021 pisoqarfiusimaqisoq qaangiussimalerpoq. Ukiortaarlu 2022 maanna tikilluaqqullugu aallartippoq.

Ukiuummi taarnerpaaffianiit qaamaneq annertusiartoqqilersoq maanna ikaarsaarfigaarput. Qaamarnup ukiortaallu nassatarisarpaa neriuunneq.

Ukiortaaq 2022, illit uangalu - Tamatta - Inuiattut ilusilersuiffigissallugu periarfissaqarfipput.

-0-

Kulturilerisortatta, timersortartut peqatigiiffilerisullu - Inuiaqatigiinni ataatsimoornermik annertuumik misigitittarpaatigut.

Timersortartuvut takutitsilluartut tulluusimaarutigisavullu ukiumi qaangiuttumi arlaqaqaat. Immikkulli eqqaasaqarusuppunga..

Inuiattut ataatsimoorneq, arnat assammik arsartartortatta amerikap nunavittaani, nunarsuarmi pissartanngorniunnissamut anngunniunneranni aasaq misigaarput. Naak nunarsuarmi pissartanngorniunnissamut anngutinngilaraluartut. Tulluusimaarneq misigaarput, nunarsuamimi nunat angisuut, inuttoqisut naligalugit – Ilami allaat ajugaaffigisarlugit takutitsipput.

Kulturilerisut akornanni nunarput nittarsaalluarneqarlunilu, inuiattut ataatsimoornerisinnut tunngavissiisumik kiisalu oqaasinnguiffigisariaqakkatsinnik oqaasinnguilluni nikisitsinnaaneq takutinneqarportaaq.

Atuakkiortup inuusuttup, Niviaq Korneliusenip Nunat Avannarliit Atuakkiortunut nersornaasiuttagaannut, nunatsinniit siullerpaalluni nersorneqarnera tulluusimaarutissaraarput.

Tulluusimaarnittali aamma malittaani atuakkiata, 'Naasuliartarpi'-p, inuiaqatigiinni unammilligassatta iliuuseqarfigisariaqakkattalu ilaannik, imminut toquttarnerup qaangerniarnissaanut oqariartuuteqarnera maluginngitsuugassaangilaq.

Unammilligassaq inuiattut ataatsimoornerikkut tapersersoqatigiinnerunikkullu aatsaat anigorsinnaavarput. Immitsinnut nukittunerulersittarpugummi akiugassaajunnaarluta, ataatsimoorangatta tapersersoqatigiikkaangattalu.

-0-

Ukiuni makkunani nunarsuarmi ilaqtariippasuit nualluussuarmik Covid-19-imik tunillatsinnikkut aqquusaagaarput.

Ilaqtariit ilissittaarlut meeqqat nualluussuarmik nalaataqarnitsinni anaanamik, ataamalik qanigisannulluunniit allamat, nualluussuup tuniluunnerani qanoq misiginerlusi oqaatiginissaa pingaaruteqarpoq.

Anaanap, ataataq qanigisavilluunniit nalunngilaa qanoq tunillatsinnaveersaarneq pissanersoq, annilaangaguillu inersimasumik oqaloqateqarit.

Nualluussuup atuunnerani eqqaasinnearpugut ikioqatigiinnerup qanoq pingaaruteqassusnaanik.

Nunaqqatigiittut ilaqutariittullu ikioqatigiinneq nukimmik tunisisarpoq ataatsimoornerulersitsisarlu. Tamanna eqqaasitsivoq nunatsinni immitsinnut ikiussagutta iliuseqassaguttaluunniit, illit uangalu tassatugaasugut iliuseqarsinnaasut.

Nualluussuup suli nunarsuatsinni tuniluuppoq, pisortallu innersuussutaat suli atuupput.

Nunatsinni inooqateqarpugut sumiiffearporlu nakorsaqarfiunngitsunik, taakkualu nualluussuarmut illersussagutsigit tamatigit mianersortumik iliuseqartuartariaqarpugut.

Nualluussuup nunarsuarmi tuniluunna malinnaavigaarput, nunatsinnillu tuniluutinninnissaa peqqinnissaqartitalu artukkinnginnissaa siunertaralugu tuniluunna siuaruatsaaliornissaanut iliuseqartarnerit ingerlassapput.

Nunaqqatigiittut paaseqatigiilluta nualluussuup akiortigu, inuttullu ataasiakkaatut akisussaaffimmik tigusilluta sapinngisarput tamaat tuniluunnaq pinaveersaartitsigu.

-0-

Ukiumi qaangiuttumi naalakkersuinikkut allanngortoqarpoq. Innuttaasut qinersineranni naalakkersuinikkut nikittoqarpoq tassanilu innuttaasut taasinerikkut naligiinnerunnaq minnerunngitsumillu ataatsimoornerunissaq kissaatigigigaat erserpoq.

Tamanna Naalakkersuisuniit ataqquilluinnarlugu pimoorullugulu ingerlatsissavarput. Akuutitsineq ataatsimoorfeqarnerlu salliutissavagut isummallu assigiinngissuseqarsinnaaneri ataqquillugit naaperiaarfiusinnaasunik nassaarsinnaaneq anersaaralugu ingerlatsineq qitiutillugu, naalakkersuinikkut ingerlaaseq atussavarput.

Tamanna Aningaasanut Inatsisiliorbitsinni takussutissineqareerpoq. Nunatta aningaasatigit toqqammavissaa tamakkiisumik ilalerneqarpoq. Taamaalillutalu tamanit tunuliaqutserneqartumik siunnerfeqarluta.

Ataatsimoorneq nukittuunngortitsisarpoq taamaattumillu Inatsisartuni partiit tamaasa ammasumik suleqataalluarsimanerannut qujaffigerusuppakka suliassanullu aggersunut suleqatigiinnissatsinnut isumalluarlungalu qilanaarpunga.

Unammilligassagummi annertoqaat. Naligiinnerulernissarput qitiulluinnarpoq. Naligiinnerulernissatsinnullu allannguisariaqarneq pisariaqarlunnaarpoq. Naligiinnerulernikkut inuiaqatigiinni toqqissisimanarnerusumik ingerlaaseqarsinnaanerput tunngavilisissavarput.

Ilaqutariittullu toqqissimaneq qitiulluinnarpoq. Inuiaqatigiittut tamanna angussagutsigu pingaaruteqarlunnaarpoq ineqarnikkut, inooqatigiinnikkut ataqteqatigiinnikkullu siuarsaanissarput. Ilinniartitaanerup siammasissup qaffassarnissaa pingaaruteqarlunnaarpoq. Inuiaqatigiinni pisariaqartitagut piginnaasatta ilinniartitaanikkut tunngavilerneqarnissaat pisariaqarpoq. Taamaaliornitsiugut suliffeqarnikkut toqqissisimaneq annerusoq pilersissinnaavarput inuttullu ataasiakkaatut imminut ilaqutariittullu pilersorsinnaanerput qaffassarsinnaallugu – inuuniarnikkut ineqarnikkullu.

-----

Naligiinnerunnaq assigiinngitsunik ersiuteqartarpoq. Naligiinnerunnaq tassaavoq tamatta inuiaqatigiinni qanorluunniit atugassaqaraluarluta toqqissilluta inooqataasinnaanerput

periarfissaqarneq. Tamatta assigiimmik tunniussaqaarsinnaangilagut. Ilaqarpugut ikorfartorneqartariaqartunik. Ilaqarpugut tapersorsorneqartariaqartunik. Ilaqarpuguttaaq inuunerminni sulinerikkut tunniussaqaarsimallutik toqqissillutik utoqqalisariaqartunik. Inuiaqatigiittut tamanna ataatsimoorluta suleqatigiiffisigu, Naalakkersuisunilu tassunga siuttooqataassaagut...

Aallartereerpugut. Utoqqarnut atugassarititaasut pitaanerulernissaannut Naalakkersuisuniit siunniussarput Partiit tamarmik taperserpaat. Tamannali allorianerit siullersaraat.

Ukiumi nutaami inuiaqatigiit siuariartornissaannut allorianerit tullii tigusariaqarpagut. Ineqarnermut aaqqissuusseqinneq arloriarnerit pingaarnepaat ilagivaat.

Angerlarsimaffimmi tassaavoq inuunitsinni toqqissimaffissat pingaarnepaat ilaat.

Qulaajaanit ingerlanneqareerput maannakkullu pilersaaruserluakkamik ineqarnerup aaqqiissuuteqqinnissaa tullinnguukkaluttuarpoq.

Inuit namminerisamik ineqarsinnaanerannut periarfissat eqaallisarnissaat suliarissvarput. Inuit qanorluunniit inuiaqatigiinni inissisimagaluarpata angerlarsimaffeqarnissaat anguniarlugu suleqatigiittariaqarpugut. Inuit angerlarsimaffeqanngitsutut inissisimalertarnerat pinngitsoortinniarlugu ataqatigiissumik ataatsimoorluta suliarisariaqarparput.

Inuit, peqatigiiffiit, suliffeqarfiit aammalu suleqatigiiffiit inunnik annikilliteqartunik aammalu inissaaleqisunik ikuiuisut tapertaalluartullu piffissaq manna iluatsillugu qamannga pisumik qujaffigerusuppakka. Ilsi takutipparsi ataatsimoorluni nukik qanoq annertutigisoq pillersinneqarsinnaasoq.

----

Angerlarsimaffik tassaasussaavoq meeqqanut toqqissimanartumik perorfiusoq. Meeqqap angajoqqaani tamatigut pisariaqartipai taakkuummatami inuunerup aqquassaannut ilitsersuisussat asanninnermillu tunniussisussat pingaarnepaat.

Tamanut tamanna angussagutsigu angerlarsimaffinni qanigisanut tarnikkut timikkullu annersaaanerit annikillisartariaqarpagut- Akuersarneqarsinnaangillammi. Timikkut tarnikkullu annersaaanerit pillugit suliniutit arlalissuit ukiut ingerlanerini ingerlanneqartarsimapput qujanartumillu sulisut namminerlu kajumissutsiminnik suliniuteqartut inunnut ataasiakkaanut tapertaanermikkut ilorraap tungaanut alloriatitsinnaasarsimapput. Inunnik sullissisut aammalu nammineq kajumissutsiminnik inuit artorsaruttorfiini tapertaasartut tamaasa qamannga pisumik qujaffigerusuppakka ukiumilu nutaami nukissaqarlualutik sulinissaannut kissaallugit.

Malunnaateqarlualutik qanigisanut timikkut tarnikkullu annersaaanerit annikillisinneqassappata isertuaatumik oqaasinnguisariaqarneq pingaaruteqarlunnarpoq. Ajoraluatumik inuunermi anniaatinut oqaasinnguisarnerput pikkoriffingngilarput. Isertorneq matoorinerlu ilaatigut ajornannginnerusutut isigilersoorsimasarparput. Tamanna tamatsinniippoq. Pikkoriffivallaarparput inoqatitta ajornartorsiutaat uparuassallugit kanngunarsassallugillu. Tamanna toqqorterinermik, kanngusunermik, aliasunermik kamassaqaalernermillu kinguneqartarpoq.

Qanigisani timikkut tarnikkullu annersaaanerup akiornissaani tamatta peqataasinnaavugut tunniussaqaarsinnaallutalu. Ikioqqusut assuarlernagit aqquattissioqatigalugit.

Ilikkartariaqarparput qanorluunniit ukioqaraluarutta ikiorneqarnissamik oqaasinnguisinnaaneq ikoqqusinnaanerlu inuunermi ingerlaqqinnissamut sakkut pingaarnersaattut akuerisariaqarlugu.

Naalakkersuisuniit unammilligassatta annikillisinnaannut siuttooqataarusuppugut, siammassumillu ataatsimoorussamik suleqataarusussuseqarluta. Ikiorneqarnissamut aqqutit

pioeersut annertusarsinnaneri inerisarsinnaanerilu ammaffigaagut minnerunngitsumillu periarfissanik nutaanik ujartueqatigiinnissamut peqatiserinnilluta. Naalakkersuisuniit upperaarpud innuttaasut ataatsimoorluta angusassaq anguneqarsinnaasoq. Naalakkersuisuniit upperaarpud tamatta sumiikkaluaruttaluunniit tamatsinnut iluaqutaasussamik tunniussaqsinnaasugut.

----

Inuunitsinni inuttullu ataasiakkaatut inuiattullu siuariartuutissaqartilluta imminut qiviartuartaqarpugut.

Innuttaasusugut tamatta piginnaaneqarpugut. Tamatta assigiinngitsunik pikkoriffeqarpugut. Anaana ataatalu sulisappata meeqqerisut, ilinniartitsisut sunngiffimmilu susassaqtitsisut sulissapput.

Utoqqartagut isumassorneqartussaapput.

Neisassaqassagutta piniartoqartariaqarpugut aalisartoqarlutalu pisaasalu suliarineqarnissaanni sulisoqartussaalluni.

Pisiniarfimmiut angerlarsimaffitsinni pisariaqartitagut pisiassaatikmullugit sulipput.

Eqqakkagut initsinnilu innaallagialersuutigut atorineqassappata isumagineqartuartaqarpud.

Peqqilluta toqqissimallutalu inooqataasinnaaqulluta peqqinnissaqarfimmiut ulloq unnuarlu sulipput.

Kikkuugaluartulluunniit annerunatik minnerunatillu nalingiillutik nunatsinnut siuariartortitseqataasinnaapput - Ullullu tamaasa sulinikkut inuppassuit maligassiullutik tamanna tunngavissittarpaat. Sulinermi pisuussutitta annerpaat ilagimmassuk

Akornatsinni arlarput iluanaarpat, uatsinnut iluaqutissalimmik sunniuteqartussaavoq.

-0-

Inuuniitsinni ilaatigut naatsorsuutiginnisanik nalaataqartarpugut ingerlariaqqinnissamullu allatut ajornartumik pisortaniit ikiorneqartariaqalersinnaalluta.

Inunnik sullissinermi tassani kommunit qitiupput. Kommunimmi tassaapput ulluinnarni innuttaasunik qanimut sullissisut.

Kommunini sulisut qinikkallu innuttaasut atugarisaasa pitsanngorsartuarnissaat pimoorussilluinnarlutik ingerlappaat. Inunnik sullissisuusut suliarujussuaq ilaatigut kiserliornarsinnaasoq kivittarpaat sapinngisartik tamaat atorlugu.

Inunnik sullissisuusut ulluinnarni tunniussaas pillugit qutsavissaqarfigeqaagut. Ulluinnarnili sulinerminni sinaakkusiunneqartut aallaavigalugit sulinerminni ilungersortitaapput tamannalu allannortittariaqarpoq.

Naalakkersuisuniit ukiumi nutaami Nunatsinni inunnik isumaginninnikkut aqqissuusaaanerput nutarternissaanut suliaq aallartissavaat. Inunnik isumaginninnikkut sulinermi oqartussaaffiit ataqatigiissumik sulinerat annertusassavarput. Inuit ataasiakkaat nukiit piginnaasallu pigisaat aqqissuusseqqinnermi qitiutillugit sulineq ingerlanneqassaas.

Suliffissaqarnermut aqutissiusinerit akileraartarnikkullu aqqissuusseqqinnerneq suliarisariaqakkatsinnut ilaapput. Isumaginninnikkut, suliffissaqarnikkut akileraartarnikkullu nutarterinerneq sulinerup aqqissuunneqarnerani inuiaqatigiittut tamatta attuumassuteqarfigaarput.

Nutaamik aqqissuussaaneq taamaallaat iluatsissinnaavoq siammasissumik naalackersuinikkut paaseqatigiiffiusumik ilusilersorneqarpat. Naalackersuisuniit paaseqatigiiffissarsiorfiusumik ingerlaaseq atugarput ingerlateqqissavarput taamaaliornitsiugt innuttaasut peqataatilluarneqarsinnaaner atugaasalu malunnaatilimmik pitsaanerulernissaat qulakkeerneqarsinnaammat.

Qularutiginnilaralu inuit sullitagut pillugit paaseqatigiissinnaasugut. Nukigut siunertamut pitsaasumut kattullugit suliniarta. Qinikkammi aammami inuiaqatigiit tassaavugut, nunatta inuisalu siuariartortuarnissaanut suleqatigiittussat.

-0-

Nunarput pillugu tamatta takorluugaqarpugut. Takorluukkatta qiteraa tamatta nunarput inuuffigiuminarnerulersikkusukkatsigu.

Isuma tamanna imminermi nukiuvoq naak anguniarneranut aqquit isumaqatigiinngissutaasinnaasaraluartut.

Piffissami aggersumi ikioqatigiinnikkut suliassaqarpugut. Nunatsinni mittarfissuit Inatsisartut aaliangernikuunerata tunngaviligaanik, suliarineqarlutik aallartissimalereerput, kujataanilu Qaqortumi aamma mittarfiliortoqassaaq. Atuutilerpata nunatsinni nunatsinnullu angallanneq allangorujussuartaavoq periarfissanillu nutaanik pilersitsissalluni.

Ukiumi nutaami mittarfissuit atuutlernissaannut suleqatigiilluta aqutissat periarfissallu nutaat ineriartariaqarpagut inoqarfinni tamani – Illoqarfiimmi mittarfittaartussat kisimik ineriartuutiginagu inuiaqatigiit tamarmik ineriartornermit tassanga iluaqutissinneqarnissaat pingaaruteqarmat.

Pingaarnepaavoq najugarisami namminerisamik pilersinneqarsinnaasut sorlaqartinnissaat taamaaliornikkut piginnaasat pigerikkat atorluarlugit inerisaasoqarsinnaassammat.

Nunatsinni nukit, ilisimasat, ilinniartitaaneq aamma aningaasat kaaviaartut amerlisikkumallugit suliniarnerput aallutissavarput naligiinnerusumik inuuneqalersinnaajumalluta.

Nunatsinni sumiiffinni amerlanerpaani takornariaqarnermut piginnaasallit piupput. Piginnaasaat aallaavigalugit Nunatta tikikkuminarsarnissaanut suli at suleqatigiissutigalugit aallartisartariaqarpagut nunarput assissaqanngitsoq avatangiisinut akisussaassusilimmik misigisassarsiorfigisinnaangortikkumallugu.

Misilittagarilikkagut tamatsinnut pitsaasumik sunniuteqarsinnaanngoqqullugit inuiattut imminut napatissinnaangornissarput anguniarlugu suleqatigiissaagut.

-0-

Aalisarneq piniarnerlu nunatsinni pikkoriffigaarput. Nunatsinni aalisarneq isumalluutitta pingaarnersarisaanni siuariartornissarput pisariaqartipparput. Inuiaqatigiinni siunertagut pitsaasut angussagutsigit aalisarnikkut inuussutissarsiteqarnitta pikkoriffisattalu ineriartortinnissaa pisariaqartipparput.

Inuussutissarsiut pingaaruteqartoq pillugu qanoq siunissami aqqissuunneqarsinnaanera nalilersuineq aalisarnermit susassaqartunit ukiaq saqqummiunneqarpoq. Nalunaarussiaq siammasissumik oqaluserineqarnissaa nalilersuinermilu akuutitsinissaa pingaartueqarluinnarluni.

Ukiumi nutaami aalisarneq pillugit isumasioqatigiinnerit ingerlanneqassapput inuussutissarsiutsinnut pingaaruteqartumut inuiaqatigiit oqaloqataanissaat periarfissikkumallugu.

Aalisarnerulli aaqqissuuteqqinneqarnissaa qanoq iluseqarumaarnersoq oqaloqatigiinnerit takutikkumaarpaat. Pingaernerpaarli tassaavoq aaqqissuusseqqinnerup maannakut inuutissarsiuteqartut pillugit suliaassanngimmat kisiannili kingulissatta inuutissarsiuteqarsinnaanissaannik qulakkeerinnittussaammat.

Aalisarneq, takornariaqarneq avatangiisittalu atorluarneqarnissaat qulakkiissagutsigit Appolo-p Saatormiup oqaasii atorlugit aqcutip atugassatta qiterpiaa naatsumik imatut eqikkarneqarsinnaavoq:

*“Kingullertut inuusutut piunnaartariaqarpugut.”*

---

Inuiaqatigiittut ikittunnguuvugut, nunarujussuarmi siassimalluta inuusut. Tamanna tamatta nalunngilarput. Tamaakkaluatoq Nunarput nunarsuarmioqatigiinnut annertoorsuarmik sunniuteqarluartumillu tunniussaqaarsinnaavoq, aamma tunniussaqaartarpoq.

Nunatsinni avatangiisitta pisinnaasai qiviartigit, silap pissusaata tunniussinnaasai.

Nukissiuuteqarnermik imminut akilersinnaasumik napatissinnaalluarpugut. Nukinnik sinnilinnik peqarpugut nunatta inuussutissarsiornikkut iluaqutissaanik. Ataavaartumik nukissiuuteqarneq erngup nukia atorlugu nunarsiarmioqatigiit nukissiuutiminnik allannguiniarnerannut tunniussassaqaarpugut niiverutaallualersinnaasumik.

Naalagaaffippassuit nukissiuutit ataavartunik minguinnerusunillu atuinissamik anguniagaqanerat nunatsinnut siuariartornissamut periarfissiivoq. Nunarsuarmioqatitta kinguaassamik nerisassaqaartuarnissaat inuuffissaqaartuarnissaat pillugu silap pissusaata inuit pilersitaannik kissakkiartuaartinneqarnera annikillisarlugu iliuseqarput.

Nunarsuarmiut nunarsuatsinnut mianerinninnerusumik inuuneqarusunnerat uagut iliuseqarnikkut peqataaffiginiartigu. Issittup inuisalu avatangiisimut mianerinnittuunerat nittarsaanniartigu Kalaallit Nunarpullu nunat minguinneraattut inuutissarsiornikkut inissillugu.

Siunissami nunatut naalagaaffinngorumaartussatut nunarsuarmioqatigiinni suleqataasinnaanerput maanna takutinnissaanut periarfissaqaarpugut. Takutitsigu nammineerluta nunatta ineriartortinneranut nunarsuamioqatigiinnut akisussaassusilimmik aaqqissuukkipput. Avangiisigut mianeralugit atorluarlugit aalisarnikkut, takornariaqarnikkut, nukissiuuteqarnikkut aatsitassarsiornikkullu ineriartorsinnaavugut nunarsuarmioqatigiit isumaqatigiissutaat peqataaffigalugit.

Nunarsuarmioqataanermi tunniussassaqaarneq sunniissinnaanerlu inuiaattut amerlassutitsinniingilaq iliuserisinnaasatsinniillunili.

-0-

Naggasiutigalugu oqaatigerusuppara inooqatigiinnitsinni immitsinnut ikorfartorlulalu nukissamik aallerfigiuarariaqartugut.

Inuiattut inooqatigiinnerput ataatsimoorfissaqarpoq, ataatsimoornerunikkut inuiattut sulit nukittunerulernissarput tunngavissitsigu.

Inuiattummi ataatsimoornerissarput, tapersorsoqatigiinnissarput nukittorsaqatigiinnissarpullu aatsaat taamak pingaartigilerpoq.

Ataatsimoornerisigut tapersorsoqatigiinnitsigullu aatsaat, inuiattut unammilligassavut aammalu avatitsinnit, nunatsinnik issittumillu soqutiginninnerujussuaq pissaanilissuarnit

pissaaneqarniuffiulersimasoq, akiorniassallugit aaqqiissutissanillu nassaarfigigalugit anigorsinnaavagut.

Ileqqut kingornuttagaapput. Anaana, ataata inersimasullu imminnut qiimmassaqtigiittut tapersersoqtigiittullu meeqqatsinnut takutittuarutsigit, qiimmassaqtigiinneq nersualaarinninnerlu inuiattut naleqartitatut pilersissavagut.

Timikkut, tarnikkut anersaakkullu pikialaartitsillutillu nukissamik tunioraasuusut qiimmassartuartigit, uagut piginnaasarinngisatsinnik piginnaanillit nersualaartartigit. Ataasiakkaarluta ataatsimoorluta nukittuffigut tunniussinnaasavullu inissaqartillugit.

Qutsavigisigit meeqquerivinni sulisut, ilinniartitsisut, sunngiffimmi ornittakkani sulisut, utoqqaat illuani isumassuisut napparsimasunillu paarsisut.

Aalisartut piniartut nunaqqatigiit naleqartitatsinnik nerisaqartikkumalluta inuiattullu napatikkumalluta ullorpassuarni piniarlutik angalasartut.

Qutsavissaapput kattuffiit nunatsinni uummaarititseqataallutik suleqataasut, ilissittaaq tamassi nunarput pillugu sulisusi suleqataanissinnut qujanaq.

Minnerunngitsumi sinerissami inuit kajumissutsiminnik suleqataasorpasuit: Qujanaq pilluta suligassi, nukissamik annertuumik nunaqqatitssinnut tunniussivusi.

Qanortoq ukioq tamatsinnut 2022 iluanaarfiugili.

Ukiortaami tamassi pilluaritsi.

Guutip Nunarput sernigiliuk.